



Nataon'ny Loholona Russell M. Nelson

Ao amin'ny Kôlejin'ny Apôstôly Roambinifolo

Taranaka Mifandray amin'ny alalan'ny Fitiavana

Ilay faniriantika voajanahary ny bifandray amin'ny fianakaviansika dia tanteraka rehefa voafatotra amin'ireo razambentsika isika amin'ny alalan'ireo ôrdônansy masin'ny tempoly.

Mampitamberina an-tsaina ny fahatsiarovana ireo namana malala sy havana ny taratasy voaraintsika amin'ny fotoan'ny Paska na Krismasy. Fenô sarim-pianakaviana tena sarobidy ao anatin'ny hafatra sasany. Isan'izany ity iray ity izay nahasarika ny saiko tokoa.


Izy ity dia avy amin'ilay zafiafinay vavy. Ho antsoiko hoe “Ruby Malala” izy. Mampahatsiahy ahy ny reniny tamin'ny reniny nitovy tamin'ny taonany ity sary ity. Nokarohiko tao amin'ny antontan-taratasiko ny sarin'ny renin'i “Ruby Malala”—iray amin'ny zafikelinay vavy.

29 taona lasa izay no nakako ity sarin'ny renin'i “Ruby Malala” ity. Mbola tena manga be ny masony tamin'izany.

Nipoitra ilay fahatsiarovana mamy efa ho dimampolo taona lasa izay, rehefa teraka ka tonga olona vaovao indrindra tao amin'ny fianakavianay ny reniben'i “Ruby Malala”—iray amin'ireo zanakay vavy. Iray tamin'ny sariny

fony izy mbola kely ity. Renibe be fitiavana izy ankehitriny, ary izaho kosa dia dadan'ny reniben'i “Ruby Malala.” (Tsy hampiseho anareo ny sariko tamin'izaho mbola zazakely aho. Tsy hanampy antsika izany.) Ireo sary ireo dia mampiseho ny fitiavana izay mampitambatra ny taranaka efatra eo amin'ny fianakavianay.

Rehefa mieritreritra ny fitiavana izay tsapako amin'ireo olona tsirairay ao amin'ny fianakavianay aho dia mahatsapa ihany koa, amin'ny ampahany kely, ny fitiavan'ny Ray any an-danitra ireo Zanany. Na dia tandindomin-doza aza ny fianakaviana manerana an'izao tontolo izao, Ny Fiangonan'i Jesoa Kristy ho an'ny Olomasin'ny Andro Farany dia mitoro, mampahafantatra ary miaro ilay fahamarinana fa ny fianakaviana no ivon'ny drafitr'ilay Mpahary ho an'ny anjara mandrakizain'ny Zanany. “Ny Fianakaviana: Fanambarana ho an'izao Tontolo Izao” ary ny ezaka goavana ataontsika eo amin'ny



“Ruby Malala,” zafiafin'ny Loholona Nelson



Ny Renin'i “Ruby Malala,” zafikelin'ny Loholona Nelson



Ny Reniben'i “Ruby Malala,” zanakavin'ny Loholona Nelson



Karatra fanaovana ôrdônansy any amin'ny tempoly

lafin'ny fanaovana tetiarana dia porofo roa mazava izay mampiseho fa mitondra fanantenana sy fanampiana ho an'ilay vondrona masin'ny fianakaviana ity Fiangonana ity.

Mampianatra isika fa tsy manampetra ny fitiavan'Andriamanitra ny Zanany. Tia azy rehetra Izy na inona na inona firazanany na zom-pireneny, na vavy izy ireo na lahy.¹ Efa hatrany am-piandohana Izy no nanao izany ary hanohy hanao izany. Manasa ny rehetra Izy mba hikatsaka ny fisandratana mandrakizay ho an'ny fianakaviany. Ny asany sy ny Voninahiny dia ny manatanteraka ny tsy fahafatesana sy ny fiainana mandrakizay—ny fisandratana—ho an'ny Zanany.² “Fa toy izao no nitiavan'Andriamanitra izao tontolo izao: nomeny ny Zanani-lahy Tokana, mba tsy ho very izay rehetra mino Azy, fa hanana fiainana mandrakizay.”³

Nahatonga ireo tanjona roa an'ny Ray any an-danitra ho tanteraka ny Sorompanavotan'ny Zanaka Malalany. Tsy ho nisy ny tsy fahafatesana raha tsy teo ny Sorompanavotana. Tsy hisy ny fiverenana eo anatrehan'ny Ray sy ny fitohizan'ny fianakaviana any ankoatry ny fasana raha tsy teo ny Sorompanavotana.

Noho ny Sorompanavotana dia afaka mandray ireo fitahiana faratampony ireo ny zanak'Andriamanitra tsirairay izay mankato ny lalàny mandrakizay. Nandritry ny tantaran'izao tontolo izao dia maro ireo Zanany no efa nandray ny fitahian'ny filazantsara kanefa mbo-la maro koa no tsy nandray. Talohan'ny nanorenana an'izao tontolo izao, ny Raintsika any an-danitra dia nanorina ny ôrdônansin'ny batisa ho an'ireo izay maty ka tsy nandray ny fahalalana mikasika ny filazantsara.⁴ Tiany koa ireny zanany ireny.

Nanome fomba ho azy ireo ihany koa Izy mba hahafahan'izy ireo ho tafiditra ao anatin'ny fianakaviana miaraka mandrakizay. Ny olombelona rehetra izay tonga eto an-tany dia naterak'ireo taranaky ny ray aman-dreny teo aloha. Manana faniriana voajanahary hifandray amin'ireo razambentsika isika. Mitoetra foana ao am-pontsika izany faniriana izany na firy taona isika na firy taona.

Eritrereto anie ny fifandraisana arapanahy izay miorina rehefa ampian'ny zatovovavy iray ny renibeny hampiditra ireo fampahalalana momba ny fianakaviana ao amin'ny solosaina, na rehefa mahita ny anaran'ny dadan'ny dadabeny ao anatin'ireo firaketana momba ny fianakaviana ny zatovolahy iray. Rehefa mitodika any amin'ireo razambentsika ny fontsika dia misy zavatra miova ao anatintsika. Mahatsapa ho ao anatin'ny zavatra lehibe kokoa noho ny tenantsika isika. Ilay faniriantsika voajanahary ny hifandray amin'ny fianakaviansika dia tanteraka rehefa voafotra amin'ireo razambentsika isika amin'ny alalan'ireo ôrdônansy masin'ny tempoly.

Noho ny lanjan'izany asa izany dia nanorina tempoly akaikikaikin'ny olona kokoa ny Fiangonana,⁵ ary natao mora mihoatra noho ny hatramin'izay ny fikarohana ny tetiarana. Nohatsarainy ihany koa ireo fomba fitadiavana sy fanomanana ireo anarana hanatanterahana ôrdônansy any amin'ny tempoly. Nandritry ny Fihaonamben'ny Fiangonana tamin'ny Ôktobra 2005 dia nanambara dingana tena tsara iray ho-raisina mikasika ny fanaovana ny tetiarana sy ny asan'ny tempoly ny Filoha Gordon B. Hinckley. Hoy izy hoe: “Iray amin'ireo lafiny manahirana ao amin'

ny asa ataontsika any amin'ny tempoly dia rehefa mihamitombo hatrany ireo tempoly ananantsika . . . manerana an'izao tontolo izao dia lasa misy ny fiverimberenan'ny fanaovana asa isolao-tena. . . . Noho izany dia nisy fotoana niatrehantsika asa tena sarotra. . . . Ny vahaolana dia mitoetra ao amin'ny fahaizana mifehy ny fivoarana avo lenta'ny teknôlôjian'ny solosaina.”⁶

Nanomboka tamin'izay dia tsy vitan'ny hoe nihena fotsiny ny zavatra niverimberina fa namoraina ihany koa ny fomba fiasa ka azo eritreretina fa afaka mandray anjara amin'ny asan'ny tempoly sy ny tetiarana ny mpikamban'ny Fiangonana tsirairay. Tapitra teo ny andro izay nisahanan'ny manampahaizana manokana izany asa masina izany. Na manao ahoana na manao ahoana ny toe-javatra iainanao, ankehitriny ianao dia afaka mampiditra ny fanaovana tetiarana ao anatin'ny fiainanao. Afaka manao sarin'ny rafitetiary ny ankizy ao amin'ny Kilonga. Afaka mandray anjara amin'ny fanaovana batisa isolaoana tena ny tanora. Afaka manampy koa ireo olon-dehibe efa antitra izy ireo hanao ny asa eo amin'ny solosaina. Afaka mitantara ny tantarany amin'ireo taranany ny ray aman-dreny. Afaka mihazona fahazoandalana hiditra ny tempoly sy hanao ireo ôrdônansy any amin'ny tempoly ho an'ireo razambeny ireo olon-dehibe mendrika izay mpikambana.

Nilaza ny Mpaminany Joseph Smith hoe: “Ny andraikitra lehibe indrindra eto amin'izao tontolo izao izay nampandraiketin'Andriamanitra antsika dia ny fitadiavana ireo havantsika efa nodimandry.”⁷ Manamora ny fanatanterahana izany mihoatra noho ny hatramin'izay ireo teknôlôjia vaovao. Namoraina amin'ny alalan'ilay rafi-pandaharana hoe “FamilySearch vaovao”⁸ koa amin'izao fotoana izao ny fanaovana tetiarana sy asan'ny tempoly. Izany rafipandaharana mifototra amin'ny Internet izany dia hanampy ny mpikambana hahita ireo razambeny, hamaritry ny ôrdônansy ilaina hatao ho azy ireo ary hanomana ny anaran'izy ireo mba halefa any amin'ny tempoly. Azo atao any an-trano izany na any amin'ireo foibe misahana ny tetiarana,⁹ na any amin'izay toerana misy Internet.

Mora arahana ireo dingana atao.¹⁰

Voalohany, dia misafidy olona iray izay irianao hanaovana asa any amin'ny tempoly ianao.

Avy eo dia ataonao printy ny Fangatahana hanaovana Ôrdônansy ho an'ny Fianakaviana. Izany taratasy izany dia manome ireo fampahalalana izay ilain'ny tempoly ary manala ny filana mitondra kapila mangirana miaraka aminao rehefa ho any.

Avy amin'ny alalan'ilay Fangatahana hanaovana Ôrdônansy ho an'ny Fianakaviana no hanaovana printy ny karatra hanaovana ôrdônansy any amin'ny tempoly. Rehefa tontosa ny ôrdônansy iray dia raketina izany ary ampidirina avy hatrany ao amin'ny FamilySearch vaovao amin'ny andro iny ihany.

Ahoana kosa ny mahakasika anareo izay tsy manana solosaina na tsy hampiasa izany teknôlôjia izany? Aza matahotra! Ataovy tsikelikely ilay dingana. Atombohy ao an-tokantrano izany. Atombohy amin'ny fampiasana baoritra tsy misy na inona na inona izany, araky ny torohevitra ny Filoha Boyd K. Packer.¹¹ Ataovy ao anatin'izany baoritra izany ireo fampahalalana manan-danja mikasika anao sy ny fianakavianao. Ataovy ao ireo fampahalalana azo avy tamin'ny fianakavianao. Avy eo dia mangataha fanampiana avy amin'ny tompon'andraikitra misahana ny tetiarana ao amin'ny paroasy na sampana misy anao. Ny rafi-pandaharana FamilySearch vaovao dia ahafahan'ilay tompon'andraikitra manatanteraka izay zavatra rehetra ilaina hatao amin'ny solosaina ho anao, ary ao anatin'izany ny fikarakarana ny anarana alefa any amin'ny tempoly. Misy tompon'andraikitra miisa 60.000 eo ho eo manompo manerana an'izao tontolo izao. Izay tompon'andraikitra ao amin'ny paroasy na sampana misy anao dia afaka hanampy anao tokoa.

Nampiova ny fomba fiasa amin'ny fanaovana tetiarana ilay rafi-pandaharana FamilySearch vaovao tamin'ny alalan'ny fanamoràna ny famoronana rohim-pirazanana iombonana. Taloha dia olona iray ihany no miasa mitokana, sy mitahiry ny firaketan'ny fianakaviany. Matetika dia tsy mahafantatra ny asa ataon'ny fianakaviana sasany akory ny olona iray. Ankehitriny dia afaka mitondra fampahalalana ny tsirairay rehefa



Nandeha tany amin'ny Tempolin'i Guatemala City any Guatemala ireo olomasina avy any amin'i Tsatòkan'i Ilopango San Salvador any El Salvador.

miara-miasa amin'ny hafa eo amin'ny fampitomboana ny fampahalalana momba ny rohim-pirazanany.

Na dia efa dingana lehibe aza ny FamilySearch vaovao dia mbola vao dingana fotsiny izany. Maro ny asa miandry. Noho ilay rafi-pandaharana manamora ny fijerena ireo fampahalalana nampidirina tao amin'ny firaketan'ny Fiangonana am-polon-taonany maro avy tamin'ireo loharano maro, dia mety hampiseho fampidirana-javatra miverimberina na fahadisoana tsy tsikaritra teo aloha ny FamilySearch vaovao. Tena fitaovana mahomby ho an'ireo izay manana razambe nandritra ny fotoan'ny mpamaky lay tokoa izany. Mila fanitsiana ireo fiverimberenan-javatra sy fahadisoana ireo, ary tsy misy afaka manao izany tsaratsara kokoa mihoatra noho ny olona tsirairay ho an'ny fianakaviany manokana.

Mety ho sorisorena ianao eo ampiatrehana ireo fanamby ireo. Nefa aoka ho tsapanao fa takatray ny ahiahiana. Ny Fiangonana, eo ambany fitarihana entanim-panahin'ny Filoha Thomas S. Monson, dia miasa amimpahavitrihana mba hanampy anao hamaha ireo olona ireo. Miara-miezaka isika handrindra ny rohim-pirazanany zanak'Andriamanitra rehetra. Asa goavana izany izay hahazoana valisoa goavana.

Asa mitondra fifaliana izany. Jereo ity sarin'ireo mpikambana vaovao ity

izay manao ny asan'ny tempoly ho an'ny razambeny. Ireto Olomasina malala ireto dia avy any amin'ny tsatòkan'i Ilopango El Salvador, San Salvador, izay vao sambany no nankanesany tao amin'ny tempolin'i Guatemala City. Mihazona ny karatra fanaovana ôrdônansy izy ireo, samy manana anarana iray tamin'ireo havany efa nodimandry izy ireo izay vao avy nataony batisa.

Mba hahafahan'ny ezaky ny Fiangonana amin'ny fanaovana tetiarana hahomby dia zava-dehibe ny torolalana sy fitarihana avy amin'ny fisoronana. Mampianatra sy mijoro ho vavolombelona momba ny fototra ijoroan'izany asa masina izany ireo mpitarika.¹² Miantso olona izy ireo ary maka antoka fa misy ireo torolalana ilaina amin'izany asa izany.¹³ Mandray ny asan'ny tempoly sy ny tetiarana ho toy ny fomba hampiakaranana ny ara-panahin'ny paroasiny izy ireo, sy hanamafisan'orina ny fiainam-panahin'ireo olona vao niova fo ary hitahiana ny fiainan'ny mpi-kambana rehetra.

Raha toa ka manana hery hitahiana ireo any ambadiky ny voaly ny asan'ny tempoly sy ny tetiarana dia afaka mitahy ireo velona koa izany. Izany dia misy fiantraikany tena tsara eo amin'ireo olona manolo tena hanao izany. Manampy marina amin'ny fanatanterahana ny fisandratan'ny fianakaviany izy ireo.



Misandratra isika rehefa afaka miara-miaina amin'ny fianakavian-bentsika eo anatrehan'Andriamanitra Tsitoha. Efa hitan'ny Mpaminany Joseph Smith ireo adidintsika: “Efa antomotra ny andro lehiben'ny Tompo . . . ,” hoy izy. “Koa aoka isika, amin'ny maha-fianganana sy vahoaka ary Olomasin'ny Andro Farany antsika, hanatitra fanatitra amim-pahamarinana ho an'ny Tompo; ary aoka isika ho ao amin'ny tempoliny masina . . . , hano-lotra ny boky mirakitra ny rakitsoratra ny maty eo amintsika, izay ho mendrika ny fankasitrahana rehetra.”¹⁴

Ny fanomanana izany rakitsoratra izany dia andraikitry ny tena manokana ary andraikitra iombonana. Rehefa miasa miaraka isika dia afaka hanao izay hankasitrahana'ny Tompo izany.

Izany rakitsoratra izany dia ahafahana manatanteraka ôrdônansy sy ahafahana'ireo razambentsika manaiky izany ôrdônansy izany raha hanaiky izy ireo. Afaka mitondra fahafahana ho an'ireo babo any ankoatry ny voaly ireo ôrdônansy ireo.¹⁵

Mifandray amin'ny alalan'ny fitiavana ny zanakay, ny zafikelinay, sy i “Ruby Malala,” ary ireo zafiafinay rehetra. Mifandray amin'ny alalan'ny fitiavana amin'ireo razambe koa izy ireo. Ireo rohim-pifandraisana ireo, izay namafisina tamin'ny alalan'ny ôrdônansy masina dia hitondra any amin'ny fisandratan'ny fianakavianay.¹⁶ Ho tanteraka eo amintsika tsirairay avy anie izany tanjona masina izany, amin'ny anaran'i Jesoa Kristy, amena. ■

FANAMARIHANA

1. Jereo 1 Korintiana 12:13; Galatiana 3:28; 2 Nefia 26:33.
2. Jereo Mosesy 1:39.
3. Jaona 3:16.
4. Jereo Fotopampianarana sy Fanekempihavanana 124:33.
5. Vao haingana ny Filoha Thomas S. Monson no nilaza fa 83 isan-jaton'ny mpikambana manerana izao tontolo izao dia mipetraka eo amin'ny 320 kilaometatra manodidina ny tempoly (jereo “Tongasoa eto amin'ny Fihaonambe,” *Liabona*, Nôv. 2009, 4.)
6. Gordon B. Hinckley, “Opening Remarks,” *Liabona*, Nôv. 2005, 5–6.
7. *Teachings of Presidents of the Church: Joseph Smith* (2007), 475.
8. Ankehitriny dia hita amin'ny fiteny Anglisy, Espaniôla, Pôrtogey, Frantsay, Alemà. Will be available in Japôney, Sinoa, ary teny Kôreanina later this year.
9. Misy foibe misahana ny tetiarana mihoatra ny 4.000 manerana an'izao tontolo izao.
10. Raha toa ka manana solosaina misy Internet ianao dia midira ao amin'ny new.familysearch.org. Raha vao hisoratra anarana amin'ny voalohany dia mila ny laharan'ny maha-mpikambana anao ianao sy ny daty nandraisana anao ho mpikambana. Afaka maka ireo any amin'ny mpitambokin'ny paroasy na sampana misy anao ianao. Rehefa tafiditra ao amin'ilay rafi-pandaharana ianao dia afaka manamarina raha toa ka efa ao amin'ilay rafi-pandaharana ny razambe-nao ary inona ireo ôrdônansy atao any amin'ny tempoly mbola ilainy. Afaka mahita razambe izay tsy fantatrao ianao ary mampiditra azy ireny koa ao amin'ny rohim-pirazananao. Ataovy printy avy eo ny Fangatahana hanaovana Ôrdônansy ho an'ny Fianakaviana mba hoentina any amin'ny tempoly ka dia hanokatra ny lalana amin'ny fanaovana ôrdônansy izany.
11. Jereo Boyd K. Packer, “Your Family History: Getting Started,” *Liabona*, Aôg. 2003, 12–17.
12. Eo ambany fahian'ny filohan'ny tsatôka, dia manara-maso ny asan'ny tempoly sy ny tetiarana ao amin'ny tsatôka ny mpikambana ao amin'ny filankevitra avo iray na mihoatra izany. Eo anivon'ny paroasy na sampana dia ny lehiben'ny vondron'ny mpisorona avo na filohan'ny kôlejin'ny loholona no mitarika izany. Maro ireo loharano, vita printy sy voarakitra ao amin'ny Internet no entina hanampiana ireo tompon'andraikitra misahana ny fanaovana tetiarana sy ireo mpitari-ka ao amin'ny fisoronana hahatontosa ireo andraikiny.
13. Ireto koa misy loharanom-pitaovana mety hanampy toy ny *Member's Guide to Temple and Family History Work* (item no. 36795), sy ny *Instructor's Guide* (item no. 35804) ary ny DVD miaraka amin'izany. Azo sintonina na jerena ao amin'ny Internet ao amin'ny lds.org ireo torolalana ireo na hafarana amin'ny alalan'ny fanampian'ny foibe fanaparihana boky.
14. Fotopampianarana sy Fanekempihavanana 128:24.
15. Jereo Isaia 61:1; Lioka 4:18; Fotopampianarana sy Fanekempihavanana 138:18, 31, 42.
16. Jereo Fotopampianarana sy Fanekempihavanana 128:18.